

ՄՆԱ՛Լ ԹԵ՛ ԳՆԱԼ. ՀՀ ԳՏՆՈՒՈՂ ՍՈՒՐԻԱՀԱՅԵՐԻ ԳԱՂԹԱՅԻՆ ՎԱՐՔԱԳԻԾԸ

ԳԱՅԻԱՆԷ ՅԱԿՈԲԵԱՆ
gayik20@gmail.com

ՆԱԽԱԲԱՆ

Ցեղասպանությունից յետոյ ծեաւորուած Ափիւղը եւ աշխարհի տարբեր երկրներում հայ համայնքների գոյութիւնը հզօր ներուժ են համարում Հայաստանի Հանրապետութեան ժողովրդագրական, ընկերատնտեսական, քաղաքական, մշակութային զարգացման առումով: ՀՀ անկախացումից յետոյ սփիւռքահայերի մօտ աշխուժացաւ թէ՛ կամաւոր, թէ՛ բնական երկրների տնտեսական ու պատերազմական իրավիճակի հետեւանքով դէպի հայրենիք վերադարձը: Դրանից անմասն չմնաց նաեւ սուրիահայ համայնքը, որի կարեւոր մէկ մասը ՀՀ տեղափոխուեց Սուրիայում ընթացող պատերազմի պատճառով:

Ազգային պատկանելիութեան գիտակցումն ու հայրենիքի յիշողութիւնը միասնականացնում են հայերին՝ որպէս ազգ, բայց անմիջական ու առօրեական շփման ու փոխազդեցութեան ժամանակ երեւան հանում միմեանց ճանաչելու եւ յարմարուելու դժուարութիւնները: Սուրիահայերը, որոնք ապրում էին այլ քաղաքական ու ընկերատնտեսական յարաբերութիւնների համակարգում, այլ կրօնական ու մշակութային միջավայրում, տեղափոխուել են բոլորովին նոր, իրենց կենցաղից տարբեր ընկերամշակութային միջավայր՝ կանգնելով վերջինիս յարմարուելու խնդրի եւ անհրաժեշտութեան առջեւ: Նոր հասարակութիւնում նրանց պատշաճեցումի գործընթացը դժուարացնող գործօնները բազմաթիւ են, որոնցից իրաքանչիւրն իր ուրոյն ազդեցութիւնն ունի ՀՀում համարկուելու եւ յետագայ կենսագործունէութիւնը շարունակելու որոշման կայացման վրայ: Սոյն յօդուածում փորձել ենք վերլուծել 2011ից յետոյ ՀՀ տեղափոխուած սուրիահայերի ներգաղթային վարքագիծը, բացայայտել դրա փոփոխման միտումները, պատճառներն ու գործօնները:

Ուսումնասիրութեան մեթոդաբանական հիմքը ազգագրութիւնում եւ էթնօընկերաբանութիւնում ընդունուած միջոսամոնքային համալիր մօտեցումներն են, իսկ գործնական նիւթը հաւաքուել է 2014-17ին հեղինակի կողմից Երեւանում եւ ՀՀ մարզերում անցկացրած հետազօտութիւնների ընթացքում, որոնք իրականացուել են որակական եւ քանակական միջա-նի մեթոդների համադրութեամբ:

1ա. Քանակական հետազօտութիւն (2014ին)՝ 184 կիսաճշտուած հարցազրոյցներ սուրիահայերի հետ Երեւանում եւ մարզերում, մասնատրապէս՝ Արագածոտնի, Արարատի, Արմափրի, Կոտայքի, Շիրակի: Ելնելով հետազօտող խմբի իւրայատկութիւնից (սուրիահայերի ոչ-յստակ թուաքանակ, շարժունութիւն, բնակութեան վայրի վերաբերեալ սուղ տեղեկա-

տոտությւն, ՀՀ տեղափոխուելուց յետոյ տարածական ցրում ձեւով ապրել եւ այլ հանգամանքներ) սուրիահայ ընտանիքների հետ կապ հաստատելու համար օգտագործուել է «ձնակոյտ»ի մեթոդը, իսկ հարցուողի ընտրութիւնը կատարուել է պատահականութեան սկզբունքով՝ կիրառելով վերջին ծնունդի մեթոդը՝

1ք. Քանակական հետազոտութիւն 2016-17ին տեղացի եւ սուրիահայ ընտանիքների շրջանում՝ Երեւան քաղաքում եւ Շիրակի, Լոռու, Գեղարքունիքի, Սիւնիքի, Արմաիրի, Արագածոտնի մարզերի վեց քաղաքային եւ քսան գիւղական բնակավայրերում: Ընտրանքային համախմբութեան ծաւալը կազմել է 384, որից 7%ը՝ սուրիահայ ընտանիքներ: Քանակական հետազոտութեան արդիւնքները հարուստ նիւթ են ապահովել ժամանակային որոշակի կտրուածքով սուրիահայերի պատշաճեցման հիմնախնդիրներն ուսումնասիրելու, ինչպէս նաեւ ներգաղթային վարքագիծը բացայայտելու համար:

2. Որակական հետազոտութիւն (2014ին)՝ խորքային հարցազրոյցներ սուրիահայերի հետ՝ նրանց խնդիրներն կարելի համապարփակութեամբ հասկանալու, մեկնաբանելու համար: Ընտրանքի չափանիշներ են հանդիսացել սեռը, տարիքը եւ զբաղումները (խորքային հարցազրոյցների ընդհանուր թիւը կազմել է 36):

ՍՈՐԻԻԱԼԱՅԵՐԸ ՀԱՅԱՍՏԱՆՈՒՄ

Սուրիահայ համայնքը եղել է Մերձատր Արեւելքի ամենահին ու ասանդական համայնքներից մէկը, արեւմտահայերէնի եւ արեւմտահայ մշակոյթի պահպանման ու զարգացման կարեւոր եւ բացառիկ օճախ: Սակայն 2011ին ծայր առած պատերազմը ճակատագրական եղաւ այդ համայնքի եւ հազարաւոր սուրիահայերի համար. նրանք ցրուեցին աշխարհով մէկ, հեռանալով անելի ապահով վայրեր՝ Լիբանան՝ մօտ 15,000, եւրոպական երկրներ, Քանադա՝ մօտ 8000, Յորդանան՝ 2000, իսկ մօտ 15,000 մնացել են Սուրիայում²: Նշենք նաեւ, որ ՀՀ Սփիւռքի նախարարութեան (ՄՆ) տնօրինութեան տակ եղած տեղեկութիւնների համաձայն՝ 22-25,000 հայ դեռեւս շարունակում է բնակուել Սուրիայում, որոնք երկրում տիրող իրավիճակի բարդութիւնից կախումա՝ մաս-մաս տեղափոխուում են ՀՀ եւ այլուր, իսկ ոմանք որոշել են մնալ տեղում³:

Սուրիահայերի տարերային ներհոսք սկսուեց նաեւ դէպի ՀՀ: Պաշտօնական տեղեկատուութեան համաձայն՝ միայն 2013ին ՀՀ է եկել 6-7000 մարդ: Այս միջակայքային տատանումը վկայում է այն մասին, որ ստույգ հաշուառում չի եղել: Առհասարակ, սուրիահայերի ներգաղթի հոսքի փաստագրման կամ տուեալների հաւաքման որեւէ մեքենայ ու համակարգ չի գործել՝ բացի ՀՀ պետական սահմանը հատելու ու վիզա ստանալու օրինապատշաճ ընթացակարգերից: Ըստ ՄՆ տրամադրած տուեալների⁴՝ 2014 Փետրուարի դրութեամբ ՀՀում բնակւում են շուրջ 11,000 սուրիահա-

յեր՝ մօտ 2800 ընտանիք: 2017ին արդեն շրջանառում է այն տեղեկատու-
ութիւնը, որ պատերազմի բռնկուելուց իվեր մօտ 22,000 մարդ է եկել ՀՀ⁵,
որոնք անընդհատ գտնուում են շարժման մէջ: Համաձայն ոչ-պաշտօնա-
կան տեղեկատուութեան՝ ՀՀ-ում ներկայումս բնակուում են 5-8000 սուրիա-
հայեր⁶:

2014ին անցկացրած հետազոտութեան տուեալներով՝ սուրիահայերի
53%ը ՀՀ է եկել 2012ին, 23%ը՝ 2013ին, իսկ 24%ը՝ 2014ին: Հիմնական մեծ
զանգուածը կազմում են հալէպահայերը՝ 82.6%, այնուհետեւ դամասկա-
հայերը՝ 5.4%: ՀՀ-ում են ապրում նաեւ Սուրիայի հայաշատ այլ բնակավայ-
րերից (Քեսապ, Քամիշլի, Րաքքա, Տէր Ջօր) եկած հայերը (ընդամենը
5.5%): Հարցմանը մասնակցած սուրիահայերի 6.5%ն էլ ՀՀ է տեղափոխ-
ուել երրորդ երկրից՝ Քուէյթ, Լիբանան, Շուէտ են., որոնք, լինելով Հալէպ
քաղաքի հիմնական բնակիչներ, թողել են Սուրիան պատերազմի պատ-
ճառով եւ մինչեւ ՀՀ տեղափոխուելը՝ եղել այլ երկրներում: Ինչպէս տե-
սանք, սուրիահայերի մեծ մասը քաղաքաբնակ է՝ ի տարբերութիւն Ի. դա-
րում Սուրիայից ներգաղթածների, որոնք առանցապէս գիտաբնակ էին եւ
աւելի հեշտ էին բնակութիւն հաստատում Երեւանից դուրս այլ վայրերում⁷:

Ստեղծուած իրավիճակում Սուրիայից հեռանալու պատճառը մէկն էր,
իսկ ՀՀ-ն ընտրելու դրդապատճառները՝ բազմաթիւ եւ տարբեր: Հետազո-
տութեան արդիւնքները վկայում են, որ ՀՀ տեղափոխուելու որոշում կա-
յացնելու գործում սուրիահայերի համար հայրենիքի գաղափարը առաջ-
նային է միւս պատճառների նկատմամբ (38.3%, աղիւսակ 1):

Աղիւսակ 1. Սուրիահայերի՝ Հայաստան գալու պատճառները, %	
Պատճառներ	%
Հայրենիքի գաղափար, հայ լինելու հանգամանք	38.3
Այլ ելք չկար, միւս երկրները վիզա չէին տալիս	18.5
Ընկերային ցանցի առկայութիւն (բարեկամներ/ծանօթներ ունեն)	7.8
Ընտանիքի անդամները նախօրօք են տեղափոխուել/վաղուց ապրում են ՀՀ-ում	7.8
ՀՀ-ում ապահով, անվտանգ է	7.0
Լեզուի իմացութիւն	6.4
ՀՀ շրջագալութիւնից յետոյ չեն կարողացել վերադառնալ Սուրիա	6.0
Աշխատանքի հեռանկար ՀՀ-ում	2.0
Այլ (մեկնել երրորդ երկիր, ՀՀ-ն մօտ է, ՀՀ-ում էժան է կեանքը են.)	6.2
Ընդամենը	100

Դրդապատճառների մէջ յաջորդ մեծ պատասխանն ունի հարկադրա-
կան երանգ (ուրիշ տարբերակ չկար՝ 18.5%), երբ այլ ելքերի բացակայու-
թեան պայմաններում սուրիահայը ստիպուած լըում է պատերազմի մէջ
գտնուող երկիրը եւ գալիս ՀՀ:

...վերջին գալս վեց ամիս առաջ էղաւ՝ որպէս գաղթական: Մենք բաւական երկար սպասել ենք Հալէպ՝ յոյսով, որ անպայման կը բարեկալովի, բայց յոյսներս կտրեցինք ու էկանք: Անցած տարի ամառը Հալէպ քաղաքը իւր արուարձաններով շրջափակուեցաւ, չորս ամիս շատ խայտառակ վիճակ մը ունեցաւ, շատ խղճալի էր վիճակը: Բանակը միայն մինակ մը միջոց ապահովեց մեզի՝ մենք մուֆ գիշերով գնտանով փախանք, յետոյ զինուորական օդանավով եկանք Լաթաքիա, Լաթաքիայէն՝ Լիբանան, Լիբանանէն՝ Հայաստան (56 տ. տղամարդ, ք. երեան)՝:

Մի կողմից՝ պատահական, միւս կողմից՝ հարկադրական հարթութեան մէջ պէտք է դիտարկել այն փաստը, որ 2012ի ամռանը շրջագայութեան նպատակով ՀՀ-ում գտնուող սուրիահայերը (6%) չկարողացան վերադառնալ Սուրիա: Սակայն, ինչպէս տեսնում ենք, պատասխանների մեծ մասը վկայում է ստեղծուած իրավիճակը նրանց կողմից բանականօրէն գնահատելու մասին՝ ընկերային ցանցի առկայութիւն (7.8%), ընտանիքի անդամների ՀՀ-ում գտնուելու փաստ (7.8%), հայերէնի իմացութիւն (6.4%), աշխատանքի հեռանկար (2%), ՀՀ-ի՝ ապահով, անվտանգ լինելու փաստ (7%), ՀՀ-ն՝ որպէս տարանցիկ երկիր (1.4%) են.: Նշենք, որ ՀՀ քաղաքացիութիւն ստանալը սուրիահայերին թոյլ է տալիս մեկնել այլ երկիր՝ նրանց համար ապահովվելով ինչպէս տեղաշարժի ազատութիւն, այնպէս էլ որոշակի իրաւաքաղաքական պաշտպանութիւն:

ՀՀ գտնուող սուրիահայերի ճնշող մեծամասնութիւնն այժմ բնակւում է Երեւանում, մի որոշ զանգուած նաեւ՝ ՀՀ տարբեր մարզերում: Երեւանում բնակուող սուրիահայերն ունեն իրենց նախընտրութիւնը վարչական շրջանների առումով. նրանք հիմնականում կենտրոնացած են Կենտրոն եւ Արաբկիր համայնքներում: Այնուհետեւ, համեմատաբար մեծ խումբ են կազմում Էրեբունի, Շէնգաւիթ, Աջափնեակ համայնքներում ապրողները: Մեր ուսումնասիրութիւնը հետաքրքիր օրինաչափութիւն է բացայայտել մարզերի պարագայում՝ նրանք կա՛մ նախընտրում են մարզկենտրոնները (օրինակ, Գիւմրի), կա՛մ Երեւանին մօտ գտնուող քաղաքային եւ գիւղական համայնքները (Վաղարշապատ, Արովեան, Աշտարակ, Ադինջ, Ջրվեժ են.):

ՍՈՒՐԻԱՀԱՅԵՐԻ ՆԵՐԳԱՂԹԱՅԻՆ ՎԱՐՔԱԳԻԾԸ, ՓՈՓՈԽՄԱՆ ՄԻՏՈՒՄՆԵՐՆ ՈՒ ԳՈՐԾՕՆՆԵՐԸ

Սուրիահայ համայնքի զարգացման յաջորդ փուլի մասին պատկերացում ունենալու համար շատ կարեւոր է նրանց՝ ՀՀ-ից հեռանալու մտադրութիւնների ու ցանկութիւնների եւ սրա հիմքում ընկած գործոնների համալիր վերլուծութիւնը, որը կը ներկայացնենք համեմատական հետազոտական տուեալների միջոցով: Սոյն վերլուծութեան հիմքում ընկած են ամերիկացի ընկերաբան Էներթ Ս. Լիի մօտեցումները: Ըստ Լիի առաջ քաշած մոդելի՝ գործում են ներգաղթային գործոնների տարբեր խմբեր՝

վանող, ձգող, միջանկեալ եւ անձնական: Նա գաղթի վանող երեւոյթների շարքին դասում է տնտեսական (գործազրկութիւն, եկամուտների ցածր մակարդակ, բարձր հարկեր), ընկերային եւ քաղաքական (աղքատութիւն, խտրականութիւն, խղճի եւ հաւատի ազատութեան սահմանափակում, պատերազմներ) բնոյթի գործօնները, անբարենպաստ բնակլիմայական պայմանները են.: Ձգող գործօններից են համարում տնտեսական զարգացման եւ եկամուտների բարձր մակարդակը, անվտանգութիւնը, աշխատաշուկայում մուտք գործելու հնարաւորութիւնը են.: Գաղթի գործընթացում կարեւոր են նաեւ միջանկեալ գործօնները, որոնք մեծանում են հեռաւորութեան աճին զուգահեռ եւ կարող են հանդէս գալ որպէս գաղթի հոսքերը սահմանափակող միջոցներ: Դրանց թուին են պատկանում փոխադրութեան ծախսերը, տեղաշարժերի կարգաւորման օրէնքները, տեղեկացուածութիւնը են.: Ըստ Նրա՝ գաղթն ընտրովի գործընթաց է, եւ նոյն գործօնները տարբեր մարդկանց վրայ կարող են տարբեր կերպ ազդել⁹: Ինչպէս տեսանք, այս մօտեցման մէջ հեղինակը կենտրոնանում է տնտեսական գործօնների վրայ: Սուրիահայերի դէպքում եւս ականատես կը լինենք Նրանց գաղթի վարքագծի հիմքում ընկած տնտեսական գործօնների գերակայութեանը:

Ըստ համեմատական հետազօտութեան արդիւնքների՝ երեք տարիների ընթացքում սուրիահայերի՝ ՀՀից հեռանալու մտադրութիւնների հարցում որոշակի փոփոխութիւններ են տեղի ունեցել (աղիւսակ 2):

Աղիւսակ 2.- Սուրիահայերի՝ ՀՀից մեկնելու մտադրութիւնը		
	2017	2014
Ոչ	25	40
Հաւանաբար ոչ	22.8	16
Հաւանաբար այո	20.7	4
Այո	31.5	40

Առաջին բանը, որ կարող ենք արձանագրել, հետեւեալն է.- նրանք համեմատաբար աւելի հաստատական են իրենց մտադրութիւններում եւ որոշումներում՝ յստակ արտայայտելով սեփական դիրքորոշումը եւ նուազ տեղ թողնելով հաւանականութեանը: Այս հարցի հետ կապուած երկրորդ փոփոխութիւնը վերաբերում է զանգուածների փոփոխութեանը՝ ՀՀից հեռանալու մտադրութիւն ունեցողները նուազել են 8.2%ով (այստեղ ի նկատի ունենք հաւանաբար այո եւ այո պատասխանողներին), բայց վերջիններս գրեթէ լիովին կողմնորոշուած են այս հարցում: Ընդհանուր առմամբ, ՀՀ տեղափոխուելու առաջին տարիներին սուրիահայերի կէսից աւելին՝ 52.2%ը (հաւանաբար կը մեկնեն՝ 20.7, այո, կը մեկնեն՝ 31.5), մտադրութիւն ունէր հնարաւորութեան դէպքում տեղափոխուել ՀՀից, եւ միայն մէկ չորրորդն էր վստահաբար մտածում, որ կը մնայ: Այստեղ որոշակի մաս է կազմում նաեւ հաւանաբար չմեկնողների խումբը (22.8%), ինչը եւս հաւա-

նականության որոշակի աստիճանով մեծացնում էր մեկնելու տրամադրություն ունեցողների զանգուածը: Տարիներ անց արդեն սուրիահայերի կեսից քիչն է մտադրություն յայտնում մեկնել (44%), եւ տասից չորսն արդեն վստահարար մտածում է ՀՀ-ում կեանքը շարունակելու մասին: Այս ցուցանիշի փոփոխությունը պայմանաւորուած է նաեւ այն հանգամանքով, որ նրանք, որոնք 2014ին մտածում կամ ցանկութիւն էին յայտնում այլ երկիր տեղափոխուելու, արդէն կատարել են իրենց քայլը՝ կեանքի այդ փուլի համար ՀՀ-ն համարելով ժամանակաւոր ապաստան:

Հետազօտութեան արդիւնքները հնարաւորութիւն են տալիս բացայայտելու ՀՀ-ից մեկնելու մտադրութիւն ունեցողների զանգուածը միջանի ցուցիչներով եւ համեմատական վերլուծութեամբ (աղիւսակ 3):

Աղիւսակ 3.- ՀՀ-ից մեկնելու մտադրութիւն ունեցողներն ըստ ցուցիչների («այդ» եւ «հաւանարար այդ» տարբերակներ)			
Ցուցիչներ		2017	2014
Սեռ	Արական	41.7	55.6
	Իգական	46.2	48.9
Տարիք	18-35	60.0	66.7
	36-55	58.3	50.0
	56 եւ բարձր	12.5	39.1
Ամուսնական կարգավիճակ	Ամուրի	57.1	53.8
	Ամուսնացած	43.8	55.1
	Ամուսնալուծուած	-	0.0
	Այրի	-	25.0
Բնակութեան վայր	Երեւան	44.0	52.4
	Այլ քաղաք	-	66.7
	Գիւղ	-	42.9
Աշխատանքի առկայութիւն	Այո	42.9	41.7
	Ոչ	45.5	55.9
Բնակարանի տեսակ	Սեփական բնակարան	-	36.4
	Վարձակալած բնակարան	38.9	52.9
	Առանց վարձավճարի բնակարան	-	66.7
	Հանրակացարան	80.0	57.1
ՀՀ տեղափոխուելու տարի	2012	57.1	42.9
	2013	75.0	71.4
	2014	25.0	54.5
	2014ից յետոյ	50.0	-
Որ երկիրն է ընկալում՝ որպէս հայրենիք	Սուրիա	-	85.7
	Հայաստան	-	43.1

Եթէ ՀՀ այցելելու առաջին տարիներին անելի շատ տղամարդիկ էին մտածում երկրից հեռանալու մասին, ապա ներկայումս՝ կանայք, ինչը պայմանաւորուած է տղամարդկանց գրադրածութեան փաստով. ՀՀ-ում

ներանց աշխատանքի/գործի առկայությունը երկրից չհեռանալու կարելու գործոններից մեկն է համարում, իսկ երկրից դուրս աշխատանքը՝ յատկապես վերջին տարիներին սկիզբ առած սուրիահայ տղամարդկանց աշխատանքային գաղթը, կանանց անհանդուրժողութեան եւ, հետեւաբար, ՀՀ-ից մեկնելու մտադրությունների ձեւատրման պատճառ է դառնում:

Տարիքային առումով նկատում ենք, որ մեկնելու տրամադրություն ունեցողների զանգուածը նուազում է երիտասարդներից դեպի աւագ սերունդ, ընդ որում, վերջին շրջանում աւագ սերնդի ներկայացուցիչներն եռակի նուազ են հակուած ՀՀ-ից հեռանալու մտքին: Միջին սերնդի ներկայացուցիչների շրջանում, ընդհակառակը, փոխուել են տրամադրությունները, եւ մօտ 8%ով աւելացել է ՀՀ-ից հեռանալու մտադրություն ունեցողների կշիռը:

Ամուսնացած սուրիահայերը, տարիների ընթացքում աւելի շատ յարմարուելով հայաստանեան իրականութեանը, աւելի քիչ են ՀՀ-ից մեկնելու մտադրութիւն յայտնում: Իսկ չամուսնացածները, ընդհակառակը, մեծամասամբ ցանկանում են հեռանալ երկրից, ընդ որում, վերջին տարիներին՝ աւելի շատ:

ՀՀ-ից մեկնելու մտադրութիւն ունեցողները մեծամասամբ մարզային քաղաքներում, այնուհետեւ՝ Երեւանում ապրող սուրիահայերն են, իսկ գիտելորդ բնակուողների կէսից շատը չի մտածում այլ երկրի գնալու մասին:

Սուրիահայերի համար աշխատանքի բացակայութիւնը հիմնական գործոններից մեկն է, որը վճռում է ՀՀ-ում մնալ-չմնալու հարցը: Այս հարցին աւելի մանրամասն կ'անդրադառնանք ստորեւ, սակայն աղիսակ 3ի տուեալները թոյլ են տալիս ասելու, որ արտագաղթելու մտքին աւելի շատ հակուած են աշխատանք չունեցողները, քան՝ ունեցողները, ընդ որում, նոր տեղափոխուած տարիներին նման տրամադրութիւնն աւելի ակնառու է եղել:

Բնակարանի առկայութիւնը յաջորդ կարելու գործոնն է, քանզի ՀՀ-ից մեկնելու մտքին աւելի քիչ հակուած են բնակարան ունեցող, իսկ աւելի շատ՝ առանց վարձավճարի բնակարաններում ապրող սուրիահայերը: Վերջինս բխում է «մինչեւ ե՛րբ ենք այս կարգավիճակում ապրելու» հարցից, իսկ նման անորոշութիւնն ու որեւէ հեռանկարի բացակայութիւնը չեն կարող չտանել արտագաղթի տրամադրութիւնների ձեւատրմանը: Այստեղ պէտք է հաստատել, որ հանրակացարաններում ապրող սուրիահայերի գերակշիռ մասը, յատկապէս վերջին տարիներին, անհեռանկարային է համարում ՀՀ-ում մնալը:

ՀՀ ժամանելու տարեթուով եւս կարելի է բացատրել սուրիահայերի մտադրութիւնները: Պարզում է որ երկրից մեկնելու մտադրութիւն աւելի շատ յայտնել են 2013ին տեղափոխուածները: Սա այն ժամանակն էր, երբ սուրիական հակամարտութիւնն աւելի սուր ու տարածական էր դարձել, եւ հայերը Սուրիայում մնալու կամ հեռանալու մասին մտածելու ժամանակ ու

հնարատրոպիան չունենի: Իսկ նման հարկադրում չներգադրեց, բնականաբար, մի օր յանգեցնելու էր նաեւ արտագաղթի հաստատական մտադրոպիաների ձեւաւորմանը:

ՀՀ-ից մեկնելու տրամադրութեան չափման հարցում ոչ-պակաս կարեւոր ցուցիչ է համարում նաեւ հայրենիքի ընկալման գաղափարը: Գիտակցական եւ ենթագիտակցական մակարդակներում Սուրիան հայրենիք համարող հայերի գերակշիռ մեծամասնութիւնը (85.7%) ՀՀ-ում ապագայ չտեսնելով, մտադիր է մեկնել երկրից: Այս ցուցանիշն ակնյայտ է նաեւ համեմատութեան մէջ, երբ նկատում ենք, որ ՀՀ-ն՝ որպէս հայրենիք ընդունողները երկու անգամ քիչ են մեկնելու մտադրոպիան ունեցողների գանգուածում (43.1%):

Ընդհանուր առմամբ, հարցմանը մասնակցած սուրիահայերի մեծ մասը (70.7%) ՀՀ-ն է համարում իր հայրենիքը, 22.8%-ը՝ Սուրիան, իսկ 6.5%-ը դժուարացել է ընտրութիւն կատարել երկու երկրների միջեւ: Խորքային հարցազրոյցներում նրանք զգացմունքային եւ իմացական խորը մտքեր են հաղորդում «հայրենիք» եզրոյթի մասին. ոմանք տրամաբանական համեմատութիւնների միջոցով, ոմանք վերացական արտայայտութիւններով, ոմանք էլ իրականութիւնը իրատես գնահատելով տալիս են հասկացութեան էութիւնը (աղիսակ 4)¹⁰:

Աղիսակ 4.- Սուրիահայերի պատկերացումները հայրենիքի մասին
Էստեղ է հայրենիքը: Ուրիշ տեղ ո՛նց կը համարես հայրենիք: Ինչքան էլ էստեղ մեզի համար ապրեր ենք, բայց շատ մանրամասնութիւններ կան, եթէ կը նայես, կը տեսնես, որ այնտեղ մեզի օտար եղեր են: Օրինակ, մեզի՝ խառն էլ նեոեցողներու, կամ, թէկուզ, աշխատող բանտորներուն արաբները միշտ էլ խփում էին, քիչ մըն ալ կոխ լինում էր: Արաբները առաջին խօսքն ըսեր են՝ դուք գացէ՛ք ձեր երկիրը: Տենց բաներ շատ ա լինում: Բայց որովհետեւ մենք ապրել ենք դիկտատուրայի երկրում, էստեղ չէիր կարայ ո՛չ նախագահին հայիոյէիր, ո՛չ վատ բան ըսէիր: Դրա համար, որ տենց սխալներ էին լինում, մենք վախում էինք, ասում էինք՝ չէ՛, արաբները լաւն են: Ո՛վ ըսաւ... (49 տ. տղամարդ. ք. Երեսան): Հայրենիքը իմ համար զգացումն ա: Հայրենիքը, եթէ հողը պիտի համարենք, ես հայրենիք ուրեմն կը համարեմ էդ հողը, որտեղ ես իմ սիրած մարդկանց հետ եմ: Էդ հանգստութիւնը, որ ես էս հողի վրայ հանգիստ եմ, ինծի համար կարեւոր է: Եթէ ապրելու պիտի գաս, էդ զգացումը պիտի զգաս՝ իբր հայրենիքի: Էդ մարդիկ են, որ բեզ էդ զգացումը տալիս են, եւ ոչ եթէ հողն ա: Հիմա ուզում եմ ծնողներուս էստեղ բերեմ, որ հարիւր տոկոս զգամ՝ թէ՛ հողով, թէ՛ զգացական, իմ հայրենիքը Հայաստանը եղաւ արդէն: Իրանք որ հոս են, ես որտեղ ալ գնամ, Հայաստանն ա իմ հայրենիքը (32 տ. տղամարդ. ք. Երեսան): Ասի ամենէն դժուար եւ բարդ հարցն է: Եթէ ես հայրենիք պիտի համարեմ, պիտի համենմ եղեսիւ, Ուրֆա. հայրերուս երկիրը ատիկա էր: Բայց այս վայրկեանին, երբ որ Սուրիան ինծի գրկեր, գուրգուրեր, մշակեր է, ես Սուրիան իմ հայրենիքս կը համարեմ: Պիտի վրադ խնդամ, եթէ ըսեմ, որ Երեսանն իմ

հայրենիքս է: Բայց հպարտ եմ, որ ես հայ եմ, եւ այս մէկ պատառ հողը ունիմ, որ այսօր եկեր եւ այստեղ նստեր եմ (55 տ. Կին, ք. Երեւան):

Դժուար հարց է: Իմ կարծիքով, սփիւռքահայի հայրենիքը սփիւռքն է: Երբ մենք գաղթականութեան ժամանակ եկանք Սօրիա, ասինքն՝ աս է մեր հայրենիքը: Փաստօրէն դա չէր: Մենք թողեցինք այն վտանգի մէջ ու եկանք: Եկանք Հայաստան ու հասկցանք, որ Հայաստանն ալ մեր հայրենիքը չէ: Մեր հայրենիքը սփիւռքն է: Հիմա շատ սուրիահայեր կան, որ մոյի կերպով կը համարեն, որ իրենց հայրենիքը Սօրիան է, բայց չեմ կրնայ ըսեմ՝ մնացե՛լ են հոն, թե՛ չէ: Իսկ նրանք, ովքեր եկան ու նորէն դուրս եկան Հայաստանէն, փաստօրէն, իրենք ալ Հայաստանը հայրենիք չհամարեցին: Միգուցէ մեր հայրենիքը մի օր դառնայ Ֆրանսիան, Գերմանիան, Շուէդիան, կամ, չեմ գիտեր, ուրիշ մի երկիր:

Շատերը կ'ըսեն՝ մեր հայրենիքը Արեւմտահայաստանն է. եթէ այն անկախանայ, կը լինի քո հայրենիքը, եթէ չէ՝ դու չունիս հայրենիք, փաստօրէն: Սփիւռքահայի հայրենիքը սփիւռքն է. ես սա կ'ըսեմ դժբախտաբար (56 տ. տղամարդ, ք. Երեւան):

Ծննդավայր-հայրենիք հասկացութիւնների փոխկապուածութեան վերլուծութիւնը եւս որոշակի օրինաչափութիւններ է բացայայտում այս առումով: Ըստ ուսումնասիրութեան արդիւնքների՝ ակնյայտ ընդհանրութիւն է նկատուում Սօրիայի փոքր բնակավայրերում (Քամիշլի, Քեսապ, Տէր Զօր, Րաքքա, Լաթաքիա, Հոմս, Արաք Փոնար) եւ Հայաստանում ծնուած հայերի մօտ, քանզի նրանց մտքերում եւ զգացմունքներում հայրենիքը միանշանակ ազուցում է ՀՀի հետ: Արաբական երկրների մեծ քաղաքներում ծնուած սուրիահայերը (Դամասկոս, Պէյրոս, Քուէյթ), կանգնելով երկընտրանքի առաջ, հարցը լուծում են՝ հաւասարապէս կարեւորութիւն տալով երկու երկրներին: Բոլորից տարբեր է տրամադրութիւնը հալէպահայերի շրջանում. թէպէտ մեծ մասը կողմնորոշուած է դէպի ՀՀ, սակայն նրանց մէջ տասից երկուը բոլոր առումներով՝ ընդհուպ մինչեւ հայրենիքի ընկալման մակարդակ, ամուր կապուած է սուրիական հողին:

Այնուամենայնիւ, սուրիահայերն ունեն ՀՀից հեռանալու իրենց պատճառները, որոնց մեծ մասը ընկերատնտեսական բնոյթ է կրում: Ինչպէս ՀՀ տեղափոխուելու առաջին տարիներին, այնպէս էլ 5-6 տարի անց սուրիահայերին անհամազստացնում են ՀՀի վատ ընկերային պայմաններն ու տնտեսութեան անբարենպաստ վիճակը, աշխատանքի եւ սեփական բնակարանի բացակայութիւնը, ցածր աշխատավարձն ու աշխատանքային ծանր պայմանները, սեփական գործի ստեղծման դժուարութիւններն ու դրանից ստացուած ցածր եկամուտը, որոնք, ընդհանուր վերցրած, կարեւոր ազդեցութիւն են ունենում նաեւ նրանց գաղթի վարքագծի ձեւատրման վրայ: Եթէ առաջին տարիներին այն ամենակարեւոր գործօնն էր (72%, աղիւսակ 5), ապա վերջին տարիներին, անելի խորանալով, դառնում է գերակայ պատճառ բոլոր պատճառների մէջ (84.6%):

Աղյուսակ 5.- ՀՀից հեռանալու պատճառները		Տարի եւ %	
Պատճառներ		2017	2014
Ընկերա-տնտեսական պատճառներ		84.6	72.0
Մշակութային-հոգեբանական պատճառներ		7.7	14.0
Ընտանիքի միալորում		7.7	10.5
Իրաական խնդիրներ		0.0	3.5
Ընդամենը		100.0	100.0

ՀՀ տեղափոխություն առաջին տարիներին սուրիահայերը նաեւ մշակութային եւ հոգեբանական մեծ ցնցում են ապրել, ինչը ոչ միայն որոշակի հետք է թողել, այլեւ ոմանց համար՝ ՀՀից հեռանալու պատճառ հանդիսացել: Վերջինս, սակայն, տարիների ընթացքում պակաս կարետոր է դառնում եւ զիջում իր տեղը ՀՀ-ն լքելու պատճառների մեջ:

Սուրիահայերից ոմանք ՀՀ էին եկել ոչ թե ամբողջական, այլ կիսուած ընտանիքներով: Հետեւաբար, ընտանիքի վերամիալորումը եւս ապագայի հարցում որոշում կայացնելու գործընթացում որոշակի տեղ է զբաղեցնում, եւ, ինչպէս տեսնում ենք հետազոտութեան արդիւնքներից, այն սուրիահայերի մի որոշ զանգուածի համար (10.5%) կատարուել/կատարուելու է ոչ թէ ՀՀի ներսում, այլ նրա սահմաններից դուրս: Տարիների ընթացքում այս հարցը եւս գնալով լուծում է ստանում՝ աւելի քիչ յաճախականութեամբ (7.7%) հանդիպելով երկրից հեռանալու պատճառների մեջ:

Եթէ ՀՀից հեռանալու պատճառներն աւելի շատ բանական են եւ ընկերատնտեսական հիմքեր ունեն, ապա ՀՀ-ում մնալու խթանները մեծամասամբ զգացական են եւ հոգեբանական երանգներ ունեն: Այսպէս, ՀՀ-ում մնալու դրդապատճառների մեջ մեծ կշիռ է ստացել ՀՀ-ն՝ որպէս հայրենիք ընկալելու եւ նրա նկատմամբ սիրոյ խոստովանութեան երեւոյթը: Եթէ 2014ի հետազոտութեան արդիւնքներով այն կազմում էր 43.1%, ապա 2017ին այն աւելի մեծ յաճախականութիւն է զրանցել (54.2%, աղյուսակ 6)՝ ցոյց տալով սուրիահայերի՝ հայրենիքի նկատմամբ սիրոյ եւ դրական տրամադրութեան աճը:

Աղյուսակ 6.- ՀՀ-ում մնալու դրդապատճառները		Տարի եւ %	
Պատճառներ		2017	2014
Հայաստանում անվտանգ է		16.7	22.2
Սա է մեր հայրենիքը, սիրում եմ այն		54.2	43.1
Ունենալ յաջատանք/սեփական գործ		8.3	2.8
Յարմարուել եմ Հայաստանի կեանքին, լեզուն գիտեմ		20.8	22.2
Այլ երկիր գնալու հնարաւորութիւն չունեմ		-	6.9
Ուզում եմ ՀՀ-ին օգտակար լինել		-	2.8
Ընդամենը		100.0	100.0

Յաջորդ՝ մեծ յաճախականություն գրանցած երկու պատասխանները վկայում են սուրիահայերի կողմից ստեղծուած իրավիճակը համարժեք գնահատելու մասին՝ ՀՀ-ից չհեռանալու դրդապատճառները բացատրելով երկրի անվտանգ լինելու և արդէն յարմարութիւն փաստով: Սուրիահայերի մի որոշ գանգուած էլ խոստովանում է այլ երկիր գնալու հնարաւորութեան բացակայութեան մասին:

Ինչպէս նշուեց վերուում, սուրիահայերի համար աշխատանքի եւ սեփական գործի առկայութիւնը ՀՀ-ում մնալու կարեւոր խթան է հանդիսանում: Եւ եթէ առաջին տարիներին այն քիչ յաճախականութեամբ է հանդիպել, ապա ներկայումս երեք անգամ աւելի ծանրակշիռ հանգամանք է համարուում նրանց՝ այլ երկիր չմեկնելու որոշման կայացման հարցում (2014՝ 2.8%, 2017՝ 8.3%, աղիւսակ 6):

ՀՀ-ից հեռանալու ցանկութիւն յայտնած եւ որոշում կայացրած սուրիահայերի մի մասն աւելի վճռական է դարձել վերջին տարիներին՝ երկրից հեռանալու ուղղութեամբ արդէն որոշակի քայլեր ձեռնարկելով: Եթէ առաջին տարիներին նրանց մէջ մօտաւորապէս տասից մէկն էր գտնուում գործողութեան փուլում, ապա 2017ի հետազօտութեան արդիւնքներով պարզ է դառնում, որ ոչ միայն մօտ երեք անգամ շատացել է նրանց թիւը, այլեւ այդ քայլերն են դարձել բազմաբնոյթ՝ ձեռք բերուած ՀՀ քաղաքացիութիւնից հրաժարուել, տարբեր երկրների դեսպանութիւններ դիմել, այլ երկրներում գործ հիմնել եւն.:

Եթէ ՀՀ տեղափոխուելու առաջին տարիներին շատ սուրիահայեր, որոնք դեռ յոյս ունէին, որ իրավիճակը կը կարգաւորուի եւ Սուրիան կը վերագտնի իր նախկին հզօրութիւնը, ցանկանում եւ մտածում էին վերադառնալ այնտեղ, ապա վերջին տարիներին նրանք աւելի իրատես են մտածում՝ մօտ չորս անգամ կրճատելով Սուրիա վերադառնալու հաւանականութիւնը (աղիւսակ 7):

Աղիւսակ 7.- Ո՞ր երկիր են նախընտրում մեկնել		Տարի եւ %	
Երկրներ		2017	2014
Սուրիա		9.1	37.3
Քանադա		18.2	5.1
ԱՄՆ		9.1	11.9
Արաբական երկրներ		9.1	1.7
Եւրոպական երկրներ		-	30.4
Դժուարանում է պատասխանել		54.5	13.6
Ընդամենը		100.0	100.0

Այդ տարիներին նրանց համար, Սուրիայից բացի, նախընտրելի եւ իրատեսական էր մեկնել նաեւ եւրոպական երկրներ (Շուէտ, Ֆրանսիա, Գերմանիա, Պելճիքա, Աստրալիա, Հոլանտա), ԱՄՆ եւ Քանադա, որտեղ, իրենց կարծիքով, ապաստան եւ տնտեսական ու ընկերային աջակ-

ցույթին կը գտնեն: Վերջին շրջանում սուրիահայերի համար ընդունող երկրներից ամենահաճախակա՛նը մնում է Քանադան: Անորոշությունը շարունակում է նաեւ այս իմաստով. նրանք թելալտ ցանկանում են գնալ ՀՀ-ից, սակայն կէսից շատը դժուարանում է ասել, թե՛ ուր: Իսկ, ընդհանուր առմամբ, թուարկուած հաւանական երկրների ցուցակը թոյլ է տալիս ասելու, որ սուրիահայերն ընդունող երկրի հետ էթնամշակութային ընդհանրութիւնները նկատում են երկրորդական՝ առաջնայնութիւն տալով ընկերատնտեսական բաղադրիչին: Եւ պատահական չեն նաեւ այն ցուցանիշները, որոնք ստացուել են «ի՛նչ պայմանների փոփոխութեան դէպքում չէք մեկնի Հայաստանից» հարցադրման արդիւնքում: Գործօնների մէջ ամենամեծ զանգուած (46.1%) կազմել են այն պատասխանները, որոնցում աշխատանք/աւ աշխատանք ունենալն է համարուել պարտադիր պայման՝ ՀՀ-ում մնալու համար: Միւս գործօնները դասակարգուել են հետեւեալ կարեւորութեամբ՝ աշխատանքի դիմաց բարձր վարձատրութիւն, սեփական բնակարանի առկայութիւն, սեփական գործ ստեղծելու հնարատրութիւն/ցածր հարկեր, քաղաքական համակարգի փոփոխութիւն, հարազատների/ընտանիքի անդամների հետ վերամիատրում, իրաւական խնդիրների լուծում, մարդկանց բարեհամբոյր վերաբերմունք (համապատասխանաբար՝ 17.1%, 13.2%, 5.3%, 5.3%, 5.3%, 2.6%, 2.6%): Այս ամենի հետ մէկտեղ պատասխանների 2.5%ը պնդում է որ անկախ որեւէ իրավիճակի փոփոխութիւնից, սուրիահայերը վճռական են տրամադրուած ՀՀ-ից հեռանալու հարցում:

Ըստ փորձագիտական գնահատականների՝ տարիների ընթացքում էական փոփոխութիւններ են տեղի ունեցել այս հարցում. սուրիահայերի այն խումբը, որը մտածում էր ՀՀ-ից հեռանալ, արդէն տեղափոխուել է այլ երկիր, իսկ ՀՀ-ում ներկայումս բնակուող սուրիահայերը, որոնք, իդէպ, ըստ իրենց գնահատականների, կազմում են ընդհանրապէս ՀՀ եկած սուրիահայերի մօտ մէկ երրորդը, այստեղ մշտական բնակութեան մտադրութիւն ունեցող խումբն է:

Մեր ուսումնասիրութիւնների շրջանակում հայաստանաբնակ հայերը եւս յայտնել են իրենց տեսակէտը՝ գտնելով որ սուրիահայ ընտանիքների վերադարձը ՀՀ ներգաղթ չէ, եւ երկրի մի փոքր վերականգնումից յետոյ նրանց գերակշիռ մասը կը վերադառնայ Սուրիա: Չնայած մշակութային եւ տնտեսական կեանքում սուրիահայերի դերակատարութիւնը կարեւորելուն՝ տեղացիների մօտաւորապէս 70%ը կիսում է նման տեսակէտ (աղիւսակ 8), որոնց մէջ մեծ խումբ են կազմում կանայք՝ տղամարդկանց համեմատութեամբ (համապատասխանաբար 71.6% եւ 67.5%), գրեթէ հաասարաչափ աւագ եւ միջին սերունդը, ապա՝ երիտասարդները (համապատասխանաբար 70.8% եւ 70.4%, 67.5%ի համեմատ), մարդային քաղաքների բնակիչները, երեսնացիները, ապա՝ գիւղաբնակները (համապատասխանաբար 76.1%, 68.0%, 66.7%):

Աղյուսակ 8.- Գաղթի վարքի վերլուծություն, փոխադարձ պատկերացումներ, %			
Դատողություններ	Համա- միտ են	Համա- միտ չեն	Դժ. Պատ.
Սուրիահայերն առաջին հնարատրության դեպքում կը վերադառնան Սուրիա	69.9	17.8	12.3
ՀՀ հայերն առաջին հնարատրության դեպքում կը հեռանան ՀՀից	88.0	8.0	4.0
Սուրիահայերը կը հաստատուն ՀՀում	40.9	46.2	12.8
ՀՀ հայերն ամեն ջանք գործադրում են ՀՀում մնալու համար	16.0	68.0	16.0

Հայաստանից արտագաղթելու հարցը քննարկման առարկայ է դառնում ոչ միայն սուրիահայերի դեպքում, այլ նաեւ՝ սուրիահայերի համար, քանզի նրանք եւս նկատել ու ձեւատրել են սեփական պատկերացումները հայաստանցիների գաղթի վարքագծի վերաբերեալ: Այս պարագայում սուրիահայերը անելի մեծ զանգուած են կազմում (88%)՝ կարծելով, որ տեղացի հայերն առաջին հնարատրության դեպքում կը հեռանան ՀՀից: Սուրիահայերի կարծիքով՝ տեղացիների արտագաղթելը, անշուշտ, մեծ կապ ունի երկրի ոչ-արդիւնաւէտ կառավարման եւ ընկերատնտեսական խնդիրների հետ: Կարեւոր պատճառների թւին նրանք դասում են նաեւ հեշտ, բայց օտար ճանապարհ ընտրելու հայաստանցիների որդեգրած «ոգնավարությունը», հայրենիքին ծառայելու նրանց ցանկութեան բացակայութիւնը: Սուրիահայերի մէջ տասն հոգուց եօթը մտածում է, որ տեղացին ոչ մի ջանք չի գործադրում ՀՀում մնալու եւ արտագաղթի ճամփան չբռնելու համար (աղյուսակ 8): Ինչպէս քանակական, այնպէս էլ որակական գնահատականներով նրանք արտայայտում են հարցի վերաբերեալ իրենց դիրքորոշումը.

...Այստեղի երիտասարդները չեն ուզեր մնալ Հայաստանում, այստեղի համար մի բան անել: Չէ՛, իրենք ուզում են գնալ Ռուսաստան: Հոն ի՞նչ կայ, չեմ հասկանում: Այստեղ է ջո հայրենիքը, պէտք է մնաս եւ պայքարիս անոր համար: Ռուսաստանն արդէն հասել ա իրա հասնելիք տեղը (կին, 22 տարեկան, ք. Երեւան)՝:

Գործը անհնար է հոս: Անոր համար մենք ամեն օր կ'ըսենք՝ ի՞նչ պիտի ըլլայ: Միայն մեզի համար չէ՛ իբրեւ սուրիացի կամ սփիւռքահայ: Արդէն տեղացին կը փախնի, կ'երթայ երկրէն: Ես անոր համար ցաւ կը զգամ՝ ինչո՞ւ, ինչո՞ւ մենք պիտի երթանք՝ իբր հայ, ուրիշին ստրուկ ըլլանք, որ քիչ մը փող շահինք: Ես ինչո՞ւ չկարողանամ իմ երկրիս մէջ ապրիմ, երկիրս զարգացնեմ (կին, 58 տարեկան, ք. Երեւան)՝:

ԵԶՐԱԿԱՅՈՒԹԻՒՆ

Սուրիահայերի գաղթի վարքագծի համեմատական վերլուծությունը ցոյց է տալիս ՀՀ-ից հեռանալու նրանց տրամադրությամբ փոփոխությունը. եթե ՀՀ տեղափոխությունը սկզբնական շրջանում նրանց կեսից անփն, ապա 4-5 տարի անց՝ կեսից քիչն է այլ երկիր մեկնելու ցանկությունն եւ մտադրությունն յայտնում: Իդէալ, նրանք այդ հարցում անելի վճռական են դառնում վերջին տարիներին՝ երկրից հեռանալու ուղղությամբ իրատես քայլեր ձեռնարկելով: Եթե առաջին տարիներին նրանց մէջ մօտաւորապէս տասից մէկն էր գտնուում մեկնելու գործողութեան փուլում, ապա տարիներ անց ոչ միայն շատանում է նրանց թիւը, այլ նաեւ այդ քայլերն են դառնում տարարնոյթ՝ ձեռք բերուած ՀՀ քաղաքացիութիւնից հրաժարուել, տարբեր երկրների դեսպանութիւններ դիմել, այլ երկրներում գործ հիմնել են.:

Եթե ՀՀ տեղափոխությունը առաջին տարիներին շատ սուրիահայեր, յուսալով որ Սուրիան կը վերագտնի իր կայունութիւնը, ցանկանում էին վերադառնալ, ապա վերջին տարիներին նրանք անելի սթափ են մտածում՝ մօտ չորս անգամ կրճատելով Սուրիա վերադառնալու հաւանականութիւնը: Եւ եթէ այդ տարիներին նրանց համար նախընտրելի ու իրատեսական էր մեկնել եւրոպական երկրներ, ԱՄՆ եւ Քանադա, ապա վերջին շրջանում ամենահաւանական երկիրը մնում է Քանադան՝ սուրիահայերի մեծ մասին կանգնեցնելով «ուր մեկնել» հարցի առջ:

Տարիների ընթացքում փոխում է նաեւ գաղթի պատճառների յարաբերակցութիւնը. ՀՀ-ն լքելու հիմքում ընկած ընկերատնտեսական գործօնը շարունակում է առաջնային մնալ՝ 4-5 տարի անց անելի խորանալով, իսկ մշակութային եւ հոգեբանական բնոյթի գործօններն աստիճանաբար յաղթահարում են պատշաճեցումի փուլերի ընթացքում:

Հարկ ենք համարում նշել, որ մենք այս ուսումնասիրութիւնը ամբողջական չենք նկատում. այն արժէ շարունակական դարձնել, յաւելել նոր հարցադրումներ, բացել նոր երեսակներ՝ ըստ յառաջացած նոր պայմանների ու պարագաների: Յամենայնդէպ, նման ուսումնասիրութիւնների բազմահարթակ քննարկումները, կարծում ենք, կարող են օգտակար դառնալ ՀՀ հայրենադարձութեան, սփիւռքի հետ յարաբերութիւնների զարգացման, սփիւռքում հայրենիքի գաղափարի ամրապնդման, Սփիւռքի՝ ՀՀ-ում ներդրումներ կատարելու, տնտեսա-մշակութա-կենցաղային նպաստ յառաջացնելու, ՀՀ-ի բարենպաստ զարգացման սատարող քաղաքականութիւններ որդեգրելու համար: Այս գործընթացի հաջողութիւնը, որը բխում է ե՛ւ Հայաստանի, ե՛ւ Սփիւռքի շահերից, պահանջում է անդադար աշխատանք՝ երկու կողմերի գործօն մասնակցութեամբ:

- ¹ Օգտագործում է ընկերաբանական հետազոտություններում՝ հարցառողի ընտրության պատահականությունն ապահովելու համար:
- ² M. Zolyan, "Refugees or Repatriates? Syrian Armenians Return to Armenia," 2015, <https://www.opendemocracy.net/od-russia/mikayel-zolyan/refugees-or-repatriates-syrian-armenians-return-to-armenia> (ընթերցում 01.07.2017ին):
- ³ «Սուրիական Հակամարտության Հետևանքով Հարկադիր Տեղահանում Եւ Հայաստանում Պաշտպանություն Հայցող Անձանց Ինտեգրման 2018-2022 Թուականների Ռազմավարություն», https://www.e-draft.am/projects/679/about#_Toc484420214 :
- ⁴ Տոնայները փոխանցուել են ՀՀ ԳԱԱ Հնագիտության եւ Ազգագրության Ինստիտուտի 2014 Փետրուարի 13ի թիւ 2470-34 գրության համաձայն:
- ⁵ <https://armenpress.am/arm/news> 23 Յունիս 2017:
- ⁶ Փորձագիտական հարցազրոյց՝ «Սուրիահայերի Հիմնախնդիրները Համակարգող Կենտրոն» հասարակական կազմակերպության տնօրէնի հետ (25 Հոկտեմբեր 2018):
- ⁷ Ա. Ստեփանեան, *Սուրիահայերը Երեւանում. Աանդականը Եւ Արդիականը Հայոց Մշակոյթում*, XVI, Երեւան, «Գիտություն» Հրատ., 2014, էջ 318:
- ⁸ Գայիանէ Յակոբեան, Դաշտային ազգագրական նիւթեր, 2014 (այսուհետեւ՝ Յակոբեան, ԴԱՆ):
- ⁹ Everett S. Lee, "A Theory of Migration", *Demography*, , 1966:1(3), էջ 47-57:
- ¹⁰ Յակոբեան, ԴԱՆ:
- ¹¹ Նոյն:
- ¹² Նոյն:

TO STAY OR TO LEAVE: THE ATTITUDE OF THE SYRIAN-ARMENIAN IMMIGRANTS
IN ARMENIA
(Summary)

GAYANE HAKOBYAN
gayik20@gmail.com

Due to the war in Syria, large numbers of its centuries-old Syrian-Armenian minority have been scattered throughout the world. Some took refuge in Lebanon, Jordan, and the Republic of Armenia, while others migrated to the US, Canada, Australia and European countries.

The paper highlights the attitude and migratory trends of the Syrian-Armenian community in the Republic of Armenia. Basing her analysis on data collected from two extensive surveys, conducted in 2014 and 2016/7, and field studies, the author examines various issues related to the integration of the Syrian-Armenian migrants in Armenia, issues like identity, fatherland, kinship, etc. Concurrently the author discusses the reasons behind their different decisions to stay or leave the country and notes that unemployment, accommodation and difficulties in coping with new conditions are among the main causes of dissatisfaction.

